

Headlines

- प्रधानमंत्री नरेन्द्र मोदी होरें आखेआ जे सरकार लोकें लेई ते लोकें आस्सेआ प्रगति दे मंत्र कन्नै कम्म करा'रदी ऐ।
- उपराज्यपाल मनोज सिन्हा होरें रसमी तौरा पर झिड़ी मेले दा उद्घाटन कीता। उनें आखेआ जे एह मेला भारतीय सांस्कृतिक बन सब्बनता ते एकता गी दर्शादा ऐ।
- उपराज्यपाल मनोज सिन्हा होरें आखेआ जे पंचायत ते मकामी निकाये दे चुनां तौले करोआए जांगन।
- सांबा ते विजयपुर कस्बें च बच्चें कोला मजदूरी कराने कोला रोकने दे अभियाने लेई समूलचे जिला सांबा च मजदूरी पर लाए दे बच्चें गी बचाया गोआ।

<><><><><><>

PM Modi

प्रधानमंत्री नरेन्द्र मोदी होरें जोर देइयै आखेआ ऐ जे सोशल मीडिया दे इस जुगै च जित्थे गलत सूचनाएं ते दुष्प्रचार दा बोलबाला ऐ, उत्थे उंदी सरकार अपने धेइये कन्नै पूरी मजबूती'नै खड़ोती दी ऐ। इक निजी मीडिया संगठन आसेआ आयोजित लीडरशिप समिट कार्यक्रम गी संबोधित करदे होई श्री मोदी होरें आखेआ जे उंदी सरकार वोट-बैंक दी राजनीति थमां दूर ऐ ते लोकें लेई ते लोकें आसेआ तरक्की दे मंत्तर गी लेइयै कम्म करै करदी ऐ। प्रधानमंत्री होरें इस गल्लै गी फही पक्का कीता जे उंदी सरकार दा लक्ष्य देशै गी इक विकसित राष्ट्र बनाना ऐ ते लोकें इससै विश्वास दे कन्नै उनें'गी एह जिम्मेदारी सौंपी दी ऐ। आतंकवाद दे मुद्दे पर श्री मोदी होरें आखेआ जे समें बदली गोआ ऐ ते हून आतंकवादी गै अपने घरें च असुरक्षित मैहसूस करदे न। मोदी होरें इब्बबी आखेआ जे 2014 च देशै दा केंद्री बजट तकरीबन 16 लक्ख करोड़ रुपें दा हा ते अज्ज एह 48 लक्ख करोड़ रुपें दा होई गेदा ऐ। उनें आखेआ जे पूंजीगत खर्च हून 11 लक्ख करोड़ रुपें शा मते दे होई गेदे न। उनें आखेआ जे अज्ज नमें स्कूलें, शोध सरबन्धी सुविधाएं ते रेलवे लेई खुल्ले मनै कन्नै पैसा दित्ता जा करदा ऐ। उनें आखेआ जे देशै च हून सवा लक्ख शा मते पंजीकृत स्टार्टअप न ते अज्ज भारत च तकरीबन 10 करोड़ लखपति दीदियां बी हैन।

<><><><><><>

Jhiri Mela (byte)

म्हान करसान बाबा जित्तो हुंदी सुच्ची सम्हाला च जंदी 14 नवम्बर थमां आयोजित कीते जा करदे सलाना झिड़ी मेले दा अधिकारिक तौर पर उद्घाटन अज्ज लेफ्टिनेंट गवर्नर मनोज सिन्हा होरें कीता। हर ब'रे कत्ते म्हीने दी पुन्नेआ दे मौके आयोजित होने आहले इस मेले च मुख्य भरै थमां लक्खां बद्धे श्रद्धालु बाबा जित्तो हुंदे मंदरै च मत्था टेकने लेई आँदे न। दिल्ली, हिमाचल प्रदेश, हरियाणा ते पंजाब सने जम्मू-कश्मीर दे बी बक्ख-बक्ख हिस्सें थमां इस ब'रे तकरीबन 20 लक्ख लोकें दे इस मेले च हिस्सा लैने दी मेद ऐ। इस दरान आध्यात्मिक ते सांस्कृतिक कार्यक्रमें दे आयोजन दे कन्नो-कन्नी मुकामी दस्तकारिएं दा प्रदर्शन बी कीता जंदा ऐ। मेले दे बवस्थित ढंग्गै सिर आयोजन लेई प्रशासन नै सुरक्षा दे निगगर प्रबंध कीते दे न। अज्ज इस मेले दा अधिकारिक तौर पर उद्घाटन करदे मौके एलजी मनोज सिन्हा होरें आखेआ

<><><><><><>

LG-Sinha Elections

उपराज्यपाल मनोज सिन्हा होरें झिड़ी मेले च करसानें ते श्रद्धालुएं दे इक बड्डे किट्ठ गी संबोधत कीता। उपराज्यपाल होरें प्रधानमंत्री नरेन्द्र मोदी हुंदे मार्गदर्शन तैहत सरकार दे धेइयै गी सांझा कीता, जेह्दे च राई-बाई खेत्तर च बदलाव शामिल ऐ। उपराज्यपाल होरें पीओजेके दे विस्थापत परोआरें पच्छम पाकिस्तान दे शरणार्थीएं, वालमिकी समाज ते होरने हाशियें पर रवा'रदे समाज दे हक्क-हकूकें दी राखी हिफाजत दी वचनबद्धता गी बी दोहराया। उनें पंचायत ते मकामी निकाय चुनां दे तौले होने दी बी गल्ल आक्खी

<><><><><><>

Gorinath Sarangi

उधमपुर दे रौहने आले 70एं ब'रे दे गोरीनाथ हुंदा जिक्र ते उंदी सारंगी दा जिक्र प्रधानमंत्री नरेन्द्र मोदी होरें अपने रेडिया कार्यक्रम मन की बात च कीता हा, होरें किश दिने पैहले नमीं सारंगी थोने परा प्रधानमंत्री मोदी ते केन्द्री मंत्री डॉ. जितेन्द्र सिंह हुंदा धन्नबाद कीता। इस म्हीने दी 12 तरीक गी डॉ. जितेन्द्र सिंह होरें गोरीनाथ होरें गी नमीं सारंगी भेंट कीती, जेहड़े जे उधमपुर थमां मन्ने परमन्ने दे डोगरा कलाकार न। आकाशवाणी समाचार कन्नै गल्ल करदे होई गोरीनाथ होरें आखेआ

<><><><><><>

Reasi Poshan Meals (byte)

सेहत ते सत्तदार खुराक बारै समुदायें अंदर जागरूकता पैदा करने दी दिशा च इक महत्वपूर्ण गैह पुट्टदे होई रियासी दे डिप्टी कमिशनर विशेष महाजन होरें अज्ज जिले च 'पोशन ऑन व्हील्स' नांS दी गड्डी गी झंडी दस्सियै रवाना कीता। लोकें तोहड़ी पुज्ज बनाने आहले इस कार्यक्रम दा मकसद पोषण विभाग आसेआ चलाई जा'रदी बक्ख-बक्ख कल्याणकारी योजनाएं ते कार्यक्रमें बारै जागरूकता पैदा करना ऐ। इस मौके बोलदे होई डिप्टी कमिशनर होरें पोषण सरबंधी मानकें च सुधार लेई समुदायिक भागीदारी दे महत्व पर लोऽ पाई। कार्यक्रम दा आयोजन पोषण विभाग रियासी दे जिला प्रोग्राम अफसर मोहम्मद अनवर बांडे हुंदी अगुवाई तैहत् कीता गेआ। इस मौके पर आकाशवाणी संवाददाता कन्नै खास गल्लबात करदे होई मोहम्मद अनवर बांडे होरें आखेआ

<><><><><><>

Ramban Cooperatives

रामबन जिले च 71में कुल भारती सैहकारिता सप्ताह – सहकार से समृद्धि दे सिलसिले च सैहकारिता विभाग नै अपनिएं गतिविधिएं गी तेज करी दित्ता ऐ। 14 नवम्बर थमां लेइयै 20 नवम्बर तगर मनाए जा'रदे इस हफ्ते दा विशे-सार ऐ : 'विकसित भारत दे निर्माण च सैहकारी समिति दी भूमिका'। इस सरबंधै च अज्ज इक जागरूकता कार्यक्रमै दा सरिस्ता कीता गेआ जेह्दी प्रधानता अतिरिक्त जिला विकास कमिशनर रोशन लाल होरें कीती। कार्यक्रम दरान सैहकारी समितिएं दिएं डिप्टी रजिस्ट्रार निष्ठा नाय्यर होरें जिले च सैहकारिता विभाग दे कम्मकाज, उपलब्धिएं ते प्रभाऽ बारै इक पावर प्वाइंट पेशकारी बी कीती।

<><><><><><>

Samba Drive

सांबा ते विजयपुर कस्बे च बच्चें थमां मजदूरी करोआने पर रोक सरबंधी इक बड्डे अभियान दे तैहत् मजदूरी लेई लाए गेदे द'ऊं बच्चें गी बचाया गेआ। इस अभियान दा आयोजन समाज कल्याण विभाग, श्रम विभाग ते सेहत विभाग आसेआ सांझे तौर पर कीता गेदा हा ते एह्दी अगुवाई सांबा दे जिला समाज कल्याण अफसर नवाज शरीफ होरें कीती। इस अभियान दे दरान बक्ख-बक्ख कारोबारी इदारें, बेकरी आहली हट्टिएं, होटलें, रेस्टोरेंटें ते गड्डिएं दे सर्विस स्टेशनें वगैरा पर जाइयै उत्थे जांच कीती गई जे क्या कुसै बच्चे गी इनें थाहरें पर कम्मै लेई लाया गेदा ऐ। इस सरबंधै च आकाशवाणी संवाददाता कन्नै गल्ल करदे होई जिला समाज कल्याण अधिकारी होरें गलाया

<><><><><><>

Kathua Muncipal

कठुआ शैहर च सफाई सुथराई उपपर नेड़मी तक्क रखने लेई कठुआ दी मुनिसिपल कौंसल आस्सेआकूड़ा-कचरा किट्ठा करने आलिएं बक्ख-बक्ख थाहरें पर सीसीटीवी कैमरे लाए गे। कठुआ दे मुनिसिपल कौंसल दे चीफ एक्जीक्यूटिव अफसर अमित शर्मा होरें दस्सेआ जे एह गैह कठुआ दे उपायुक्त हुंदे दिशा-निर्देश तैहत् पुट्टी गई ऐ तां जे कठुआ शहरा पर सफाई-सुथराई च नेड़मी तक्क रखी जाई सकै। उनें आखेआ जे किश लोक कूड़े गी सफाई मगरा कूड़ेदान दे बाहर बी सुट्टदे न। इनें लोकें दी पंचान सीसीटीवी कैमरा राएं कीती जानी लोड़चदी ते शैहरे गी साफ सुथरा रखना लोड़चदा ऐ। आकाशवाणी समाचार कन्नै गल्ल करदे होई कठुआ मुनिसिपल कौंसल दे सीईओ होरें आखेआ.....बाईट

<><><><><><>

Poonch Camp

दिव्यांग लोकें गी मदाद ते सैहयोग उपलब्ध करोआने दी इक सराहनेजोग गैह दे तैहत भारती फौजै प्रीतम स्प्रीचुअल ट्रस्ट कन्नै रलियै पुंछ च कृत्रिम अंग लाने आहले इक कैप दा आयोजन कीता। 93 ब्रिगेड दे कमांडर ब्रिगेडियर मुदित महाजन होरें कार्यक्रम दा अधिकारिक तौर पर उद्घाटन कीता। फौज दी इस गैह नै समुदायिक कल्याण ते मनुक्खी भलाई—बेहतरी आहली पैहलकदमिएं दे प्रति फौज दी निष्ठा गी दर्शाने दा कम्म कीता ऐ। इस कैप दा मकसद हादसैं, बमारिएं जां होर मंदे भागें आहली घटनाएं च दिव्यांग होए दे लोकें गी कृत्रिम अंग ते आबादकारी सरबंधी सेवां उपलब्ध करोआना ऐ। एह पैहलकदमी, मुकामी समुदायें ते खाकसरियै बन्ने आहले जिले च गरीब ते शारीरिक तौर पर अक्षम लोकें दी मदाद लेई फौज दे जतनें दा गै इक हिस्सा ऐ। इस मौके बोलदे होई ब्रिगेडियर मुदित महाजन होरें थेहारबंद बलें ते आम लोकें गी इक—दुए दे होर नेड़े आहनेने च इस किस्मै दिएं पैहलकदमिएं दे महत्त्व पर लोऽ पाई।

<><><><><><>

Goa Film Festival

सूचना ते प्रसारण मंत्रालय राष्ट्रीय फिल्म विकास निगम ते गोवा दी मनोरंजन सोसायटी दे सहयोग कन्नै भारत दे 55में अंतरराष्ट्रीय फिल्मोत्सव दा सरिस्ता करने लेई पूरी चाल्ली तैयार ऐ जेहड़ा 20 कोला 28 नवंबर 2024 तगर पणजी च लगगोग। आकाशवाणी दे जम्मू संवाददाता नै जानकारी दिती ऐ जे फिल्मोत्सव दा इस बरे दा थीम ऐ “युवा फिल्म निर्माता—भविष्य इयै ऐ” ते इस्सै मंशा कन्नै इक पुरस्कार भारतीय फीचर फिल्में च डेब्यू यानि पैहली फिल्म करने आले निदेशक लेई रखेआ गेआ ऐ जेदे नै नमें युवा फिल्म निर्माताएं गी बढ़ावा थहोग। इस सम्मान च प्रमाण पत्र दे अलावा 5 लक्ख रपे दा नकद ईनाम बी दिता जाग। इस फिल्मोत्सव दे दौरान 81 मुखें दियां 180 फिल्मां दस्सियां जाडन। भारतीय फिल्म निर्माता आशुतोश गोवारिकर अंतरराष्ट्रीय न्याय मंडल दे अध्यक्ष होडन। इस फिल्मोत्सव च भारत दिएं चार महान हस्तिएं दे 100मीं बरे गंड दे मौके पर उनेंगी चेता कीता जाग जिंदे च महान फिल्मनिर्माता निदेशक ते अदाकार राज कपूर, फिल्म निर्माता तपन सिन्हा, तेलुगु फिल्म स्टार एक्कीनेकी नागेश्वर राव ते गायक मोहम्मद रफी शामिल न।

<><><><><><>